

Pablo Colosas Anoafo Kirika Kenexō Fomani

Pablo Jesús Ifofaafō kirika kenexō fomani, Colosas anoafo

¹⁻² Ēkīa Pablo, Niospa ea nīchini, aato apaiyai keskafakī ē yorafo yoinō Jesucristoōnoa. Nofe yora Timoteo feta nō mato kirika kenexō fomai. Mā Cristo Ifofakōikē, pexe rasi Colosas anoxō Nios nikakōiyanā. Nōko Epa Niospa mato noikī mato shināfafāinō afanā mato fekaxtefanōma mā isharakōinō.

Pablo a Jesús Ifofaafō ato kīfixōfafāini

³⁻⁴ Nā nōko Ifo Jesucristo āfe Apa Nios nō mato kīfixōfafāini. Nō mato kīfikī iskafaxokī aicho fakī māmāi nō nikax mā Cristo Jesús Ifofakōikē. Nāskaxō nā Jesús Ifofaa fetsafori mā ato noikōimiskē mā nō nikamis. ⁵ Na meka shara chanīmakōi Jesucristoōnoa mā mā nikamis. Jesucristo chanīmara faax Nios ika ari mā afe ipaxatiro ixō yoinifo mā mā nikamis. Na meka chanīmara fakōixō fetsafo mā ato noikōimis. ⁶ Na meka shara Jesucristoōnoa mā nikakī taefakī mā chanīmara fakī finakōini. Nāskaxō nikakī mā tāpini chanīmakōi, Niospa mato noikī Jesucristoōxō māto chaka mato soaxoni mā chanīmara faino. Nāskakē na meka shara, nikakani maifo tii anoafori nāskarifiamisfo. ⁷ Nonori nofe yora Ipafras mato yoini. Akka nā Ipafras nofeta Cristo yonosharaxomis, nāskakē nāto Jesucristoōnoa mato yoipaoni. ⁸ Nā Ipafras ma-toōnoa iskafakī noko yoiaito nō nikamis: “Na Colosas anoafo Niospa Yōshi Sharaōnoax isharakōikaxō fetsafo noikōikani,” ixō noko yoiaito nō nikamis.

⁹ Nāskakē nā ē matoōnoa nikakī taefanitīa, ē mato Epa Nios kīfixokī xatemisma. Kīfikī ē iskafa fafafāini: “Epa

Niospa, Colosas anoafo mĩ Yōshi Sharaōxō mĩ ato amapayai keskafakĩ ato tãpimafe, mĩ ato tãpimanai keskafakĩ ato ōiti mēraxō mia tãpikaxō mia Ifokōi fanōfo,” ixō ē mato kīfixōfafāini. ¹⁰ Nāskaxō nā mato amapayai keskara mā akaino ōi Nios matoki inimakōixii. Nāskax āfe Fake keskarakōi mā itiro. Nāskaxō mā fetsafo sharafa fafafāikĩ mā Nios tãpiki finakōitiro. ¹¹ Akka Epa Niospa afama mīshtifo shara fatiroki, āfe kerex shara mitsisipakōi mato inãtiro afara afeskarafiaino aōxō mā tenekōinō. Nāskafikĩ mā tenetiro fena fenakĩma inimasharakōikai. ¹² Nāskakē mā inimakōi. “Aicho Epa Niospa,” mā fatiro nãatomāi noko imasharata afe yorafo inãpayai keskafakĩ nokorimāi inãito. Nōri afe yorafokē noko inimamaxii, a ika anokai fakishma penasharakōi. ¹³ Nāskakē noko imasharakōia anã fakish mēra nō inōma. Akka nā Satanás ika ano fakishifākōi. Nãnoa Epa Niospa noko ifia, āfe Fake fe nō ĩpaxanō. Nãato āfe Fake noikōi. ¹⁴ Āfe Fāke noko nãxonikē aōxō Epa Niospa noko ifia, nōko chaka noko soaxoyanã.

Jesús noko nãxoniōnoax Nios fe nō isharapakenaka

¹⁵ Akka nō Epa Nios ōiyamafitirono āfe Fake Jesús mai ano oni. Nāskaxō āfe Fāke noko tãpimani afe keskaramākĩ Apa Nios. Nã āfe Fake Jesús Apa Nios keskarakōi, āfe ōiti keskarakōiri. Afaa oniataima Apa Nios fe nai mēra iyopaoni. ¹⁶ Āfe Fake Jesucristoōxō Niospa keyokōi onifani, nai mēranoafoya nono mai anoafo. Nã nō ōitiromafoya, a nō ōitirofo onifani. Askatari āfe ājirifo nã afe ikafo onifata, niafakafāferi ato xanĩfori onifani. Epa Niospa āfe Fake Jesucristoōxō keyokōi onifani. ¹⁷ Afaa oniataima Cristo iyopaoni. Āfe kerex sharaōxō keyokōi kexesharakōimis. Nāskaxō fishifo kexeta, xini kexeta, oxe kexeta, nōko mai kexeta famis. Akka nãfo kexeyamaino, chakanai fetsekerana. Nai fe mairi chakanakerana. ¹⁸ Tsōakai

Jesús finōtiriroma, afaa oniataima keyokōi finōyopaonix-akī, iskaratīari keyokōi finōa. Nāfi nā chanīmara faafāfe āto Ifokōiki. ¹⁹ Nāskaxō Epa Niospa yoikī iskafani: “Ē imis keskai ēfe Fakeri nāskakōimis, nāskax nāri efe Nioskōi, nō nāskara rafekōi,” ixō inimakai Epa Niospa yoini. ²⁰ Jesús ifi cruz ikaki mastafono āfe imi foax noko nāxoni nōko chaka noko soaxoxiki. Nāskakē aōnoax Epa Nios fe nō anā isharatiro. Aōnoax keyokōi mai anoafoya nai mēranoafo afe isharatirofo.

²¹ Māto ōiti mēraxō mā Nios noikaspayanā, mā chakakōi fapaoni. Nāskata mā Nios fe rafeyamata, afe yorarikai mā ipaonima. ²² Nāskafikē āfe Fake Jesucristo nai mēraxō mai ano nīchini feronāfakekōi ikiyonō. Nāskax ifi cruz ikakinoax noko nāxoni, aōnoax Epa Nios mato fe rafexō māto chaka mato soaxotiro a keskara shara mā inō. Nāskax mā akiki nokoaito matoōnoa afaa chaka yoitiro. Nāskaxori mā yoitiro iskakakī: “Mī afara chakafamis,” ixō aōnoa mā afaa yoitiro. ²³ Nāskano na meka shara Jesucristoōnoa mā chanīmara faxō afara fetsa mā shināyamaino Epa Niospa matoōnoa yoipakenakama iskakakī: “Mī afara chakafamis,” ixō matoōnoa afaa yoipakenakama. Askatamaroko mā chanīmara faax mā inimakōiāito mato ifixii mā afe ĩpaxanō. Mā Jesucristo āfe meka shara nikakī taefani keskafakī nānorikōi keyokōi ē ato tāpimani. Ēkīa Pablo, ē Epa Niospa āfe meka yoifafāini Jesucristoōnoa ato yoikī.

Niospa Pablo yoini a Jesús chanīmara faafo ato yonoxonō

²⁴ Nāskakē ē inimai ē matoōnoax omiskōifi, māri afara afeskaraino mā Cristo Ifosharakōi faano. Cristo nokoōnoax omiskōini keskai, ēri nā afe rafemisfoōnoax nā Niospa fakefo atoōnoax ē omiskōimis. Ē matoōnoax omiskōita iskaratīari ē Cristoōnoax omiskōimis. ²⁵ Akka Epa Niospa ea katoni, a mato yonoxomis keskara ē inō, āfe meka shara ē mato yoinō. Nāskaxō ea yoikī iskafani:

“Na maniafo tii ano a ʻefe meka shara Jesucristoōnoa ato yoifofāsafafe,” ixō ea yoini. Nāskaxō ʻāfe kaifoma mēra ea nīchini. ²⁶ Na meka shara Jesucristoōnoa nōko xinifāfe tāpiyopaonifoma. Niospa ato tāpimayopaonima. Akka iskaratīa Niospa noko tāpimani nō afe yorafokē. ²⁷ Epa Niospa Cristoōnoa mato yoiyomis keskafakī keyokōi mato tāpimaxii, mato fisti tāpimatama, nā yora fetsafori ato tāpimaxii. Iskafakī ato yoixii: “ʻEfe Fake Cristo mato fe rafekakāini, nāskakē mā chanīmara fatiro a ʻē ika ano efe ipaxakī. Nā Cristo isharakōiai keskafakī ʻēri mato askafatiro māri isharakōinō,” ixō mato yoini.

²⁸ Nō Cristoōnoa yoimis, keyokōi nō ato yoifofāsafamis keyokōi nō ato yoimis nikakōinōfo. Mā isharakōiano nō keyokōi Niospa ferotaifi nō ōimasharapai a keskara shara ixii. ²⁹ Nāskakē ʻē mato yonoxokī finakōifafāini, Cristo ʻāfe kerex shara ea ināno.

2

¹ Akka ʻē mato yoipai mā tāpinō, ʻē mato Epa Nios kīfixōfafāini. Laodicea anoafō yafi fetsafori a ea ōimisfoma nāfori ʻē ato Epa Nios kīfixōfafāini. ² Nāskaxō ʻē mato kīfixōfafāini mātō ōiti mēranoax mā inimakōiyanā, mā ranā mā nōinākōinō. Nāska faatanāxō Epa Niosnoa xafakīakōi mā tāpitiro, akka a iyopaonifāfe Cristoōnoa tsōa tāpiyopaonima. Nāskakē iskaratīa xafakīakōi mato tāpimapai aōnoa mā tāpisharakōinō. ³ Nāato keyokōi tāpikōia, Apa Niospa tāpia keskafakī ʻāfe shinā mēraxori tāpikōia. Akka Epa Nios afarafo sharafoyakē, Cristoōxō mā tāpitiro. ⁴ Nānori ʻē mato yoi, tsōa mato pārayamanō, meka fetsafaxō fanīrira mato yoipaikani kiki. ⁵ ʻē mato fe iyamafixō pena tii ʻē mato shināi. Akka matoōnoa nikai ʻē inimakōi, mā chanīmara fakōixō mā Cristo nikakōiaito.

Jesucristo nōko ōiti fetsafaxōfaano a keskara shara nō inō

⁶ Nāskakē mā nōko Ifo Jesucristo chanīmara fakōixō, mā Ifofakōina. Nāskakē pena tii afe rafefafāikāfe. ⁷ Oa afara fanafono āfe tapo mai mēra chaikōi kaax fer-oitiro ma keskara, Jesúsri nāskarakōikī, afe rafefafāikāfe afaa chakafatama a keskara shara ixikakī. Ipafras mato yoini keskafakī pena tii nikakōikī Jesús chanīmara fafafafāikāfe. Nāskaxō pena tii Epa Nios aichofa fafafāikāfe.

⁸ Nāskakē kexemesharakāfe, fetsafāfe mato pārāyamanōfo. Mā Jesús nikakōiai keskafakī anori mato yoipaikanima. Akka nā mato yoiaifo keskara mā ato nikakī kaxpakōi mā ato chanīmara fatiro. Nāfāfe Cristoōnoa yoikōikanima, nāskaxō nā imisfo keskakakī mato yoipaikani. Nā chanīmara faafāfema shināifo anori fisti mato shināmapaikani.

⁹ Akka Cristo fe Apa Nios nāskara rafe, Cristo noko keskara feronāfakekōifiax Apa Nios imis keskara nā nāskakōini. ¹⁰ Nāfi keyokōichi āto xanīfokōiki, xanīfo fetsafoya, a niafaka chakafāfe āto xanīfofo finōkōinīfofāna. Nāskakē mā Jesús fe rafexō mā afaa fetsa yopaima. ¹¹ Askatari mā Cristo Ifofai akka feronāfakefāfe āto foshki repa xatepaonifo, nāskaramāi feyafakatsaxakakī. Akka mā foshki repa xatefiafono māto chaka mato soaxotiro ma. Cristo fistichi māto ōiti mato fetsafaxotiro, māto chaka mato soaxotiro afianā a mā chaka apaoni keskara mā anā atama a keskara shara mā inō. ¹² Akka mā maotisai faka mēra mā ikinitīa, nā mā chakafapaonifo oa maia keskara, askatari nā Jesús maifanifotīa a mā afara chakafapaonifo oa maia keskarāfo. Mā faka mēra iki maotisameax mā fininākafāni oa Jesús fe fininākafani shinātsatiro mā a keskara sharakōi ixiki. Niospa āfe kerex sharaōxō afianā Jesús otofani nā nō chanīmara fai. Askatari mai mēranoax Jesús otonitīa, māri afe otoni keskara itiro, a keskara sharakōi ixiki. ¹³ Mā Jesús

Ifofoamax nã yora naa keskara mã iyopaoni. Nãskaxõ mã afara chakafapaoni mãto chaka xatexoma. Nãskafikẽ Epa Niospa Cristo otofani afe nipaxanõ. Nãskarifiakĩ matori aõxõ nimapakexatiro, nãskaxõ nõko chakafo mã noko soaxona. ¹⁴ Shinãkapo. Keyokõi nõ chakafamis keskara nõko chakafo Epa Niospa noko soaxoni, anã afoõnoa shinãyamaxii. Nãskano Niospa yoini keskara nõ nikatama afara fetsa nõ chakafapaoni. Nãfo keyokõi nõ chakafamisfo keskara kenepakea. Askafixõ ifi cruz ikakinoa Jesús mastanifoxõ não nõko chaka noko soaxoni. ¹⁵ Akka Cristo ifi cruz ikakinoax noko nãxonixakĩ, Satanás yafi keyokõi niafaka chakafo finõkõia. Nãskakẽ noko anã afeskafatiroma, anã nõko ifo ixõ noko ìkitirofoma. Nãskakẽ Jesús ifi cruz ikakinoax naino Niospa keyokõi maifo tii anoafoto ato ispani na niafaka chakafo anã kerexfoma.

Jesús ika ari nai mēra sharakōi nã fisti fichipaikāfe

¹⁶ Akka mãto xinifãfe ãto feyafati ipaoni xinia fena ikaino fista apaonifo. Askatari oxe rama kãiyaino fista apaonifo. Akka mato yoitirofo iskafakakĩ: “Afaa mã pitiroma askatari afaari mã ayatiroma. Askatari nõko pena tenetitĩa mãri tenetiro,” ixõ mato yoitirofo. Akka mã askayamaino fetsafãfe mato mekafakĩ ìchatirofo. Mato askafaifono ato nikayamakãfe. ¹⁷ Akka nã mãto xinifãfe ãto feyafati noko õimatirofo afe keskara iximãkai a Cristo oaino. Akka mã Cristo oano nã fisti nõ Ifofatiro. Nã nõ feyafamis keskara nõ anã atiroma. Cristo fisti nõ nikatiro a nõ ayopaoni keskara nõ anã axikima. ¹⁸ Õisharakãfe fetsafãfe mato pãrapaikani kiki iskafakakĩ: “Nõ afaa tãpiama. Æjirifo nõ kifitiro,” ixõ mato pãrapaikani. Afãfe afaa õiyamafikatsaxakakĩ afama mĩstiffo yoipaimisfo. Æto shinãmã shinãkata kakapaikõimisfo, Niospa shinãi

keskarakai shināmisfoma. ¹⁹ Afokai Cristo fe rafepaikani-ima. Akka Cristo nōko mapo keskara askatari nō āfe yora keskara. Nāskaxō nōko yora nō kexesharax nō mitsisipakōi itiro. Nāskatari nōko pono efapayafo, nōko pono mīshti, nōko nami mēranoax ichanātirofo. Afeskatama nō isharakōinō. Akka nō Cristo fe rafekōiaito Epa Niospa āfe Fākeoxō āfe kerex shara noko inātiro a keskara shara nō inō. Nāskarākōi noko axopai.

²⁰ Mā oa Cristo fe naa keskara mā ini. Nāskakē iskaratīa a mā chakafapaoni keskara mā anā akima. Askatamaroko mā isharakōimis. Mā askaito nā chanīmara faafāfema mato afaa yoitirofoma. Nāskafekē, ŷafeskakī mā ato nikaimē, mā ato nikaxō nā mato yoiaifo keskara ma apai? Nāskakē ato nikayamakāfe. ²¹ Nāskakē mato yoiki iskafapaikani: “Na afarafo meyamakāfe, afori piyamakāfe, mato ināifonori mato mēkemā achiyamakāfe,” ixō mato yoipaikani. ²² Akka na mato yoipaiyaifo keskara Niospa anori ato yoiaima. Āa shinākaxō mato yoipaikani. Akka nā mato yoipaiyaifo keskara nāfo mā keyoxii, anākai afo inakama. Nāskakē ato nikayamakāfe. ²³ Chanīma, yora fetsafāfe shinākī iskafakani. Na ato yoiaifo keskara shara, nafāfe tāpikōiafo, a Niospa noko yoini keskarari tāpikōiafo. Nāskakē Niospa āfe ājirifo kīfifafāikani. Nāskakatari ato fanīrira mekafamisfoma, askatari āto yorari mese famisfoma āa koshamemisfo. “Nafō sharakōifo,” ixō atoōnoa yoipaikani. Akka afokai isharakōimisfoma. A afarafo chakafaifo keskarakai xateafoma, chanīma nāfo kakapaikōimisfoki.

3

¹ Akka Cristo naax anā otonākafani keskai māri nāskariai afe otonākafani keskara mā itiro mā isharakōiax afe ipaxakī. Cristo iskaratīa Apa Nios fe ika afeta keyokōi ikinā. Nāskakē aōnoa shināta nā mato

amapaiyai keskara aōnoa shināfafāikāfe. ² Nāskakē nā Niospa fichipaiyai keskara fisti shinākāfe, nāskakōixikakī. Akka nono mai anoxō yorafāfe afara chakafapaiyaifo keskafakī māri askafayamakāfe. ³ Anā ē mato yoi Cristo noko nāxoni. Akka mā oa Cristo fe naa keskara iyoni, nāskakē iskaratīa mā afe rafekakaini, Epa Nios feri mā askakakāini. Nāskariai Epa Niosri mato fe rafekakaini. Mā askaito tsōa mato tāpitiroma, a mā Cristo fe rafeai keskai ari askaxiki. ⁴ Cristo anā mai ano fotofaino māri afe ixii. Nāato noko ikipakenaka. Nāskakē a keskara sharakōi nōri afe ixii, keyokōichi yorafāfe noko ōixikani.

Nō chaka iyopaonixakī iskaratīa nō ōiti fena sharayakōi

⁵ Nāskakē a mā afarafo chakafapaoni keskafakī anā askafayamakāfe. Askarafo anā shināyamakāfe. Askatari māto āfimafori chotayamakāfe, kērofāferi māto fenemafori chotamayamakāfe. Nāskaxō ato chaka shināmayamakāfe. Afarafori noiyamakāfe feronāfakefāfe māto āfima fichipaiyamakāfe, kērofāferi māto fenemafo fichipaiyamakāfe. Afara chakafori fichipaiyamakāfe, nā mā fichipaiyai fisti fichipaiyamakāfe. Mā askakī Nios mā noima, nā afarafo fisti noikī. ⁶ Askara chakafo Niospa ōipaima, nāskakē ato omiskōimakī finakōixii nikayamaifono. ⁷ Nāskakē taeyoi chakakōi mā iyopaoni Nios nikamax. ⁸ Mā mā askapaoniki. Akka iskaratīa a chakafo shināmakikāfe. Anā ōitifishkiyamakāfe, anā chaka shināyamakāfe, ato chakafayamakāfe, ato ichayamakāfe, askatari māto axfapa meka chaka yoiyamakāfe. ⁹ Nāskakē mā ranā pāranōnāyamakāfe, mā taeyoi ipaoni keskara a chakafo mā mā potakōiakī. ¹⁰ A mā apaoni keskara anā atama iskaratīa, mā mā Jesucristo fe rafekōia a keskara shara ixiki. Akka Epa Niospa māto ōiti mēra fena sharakōi mato ōi. Nāskakē a keskara sharakōi mato

imafafāini, aōnoa mā tāpisharakōinō. ¹¹ Nō Cristo Ifofakē Niospa keyokōi nāskarafos noko ōi. Judeofo yafi a judeofoma, a kene tāpiafoya a kene tāpiafomari, yorafoya nafafo āto yonomatifoya a āto yonomatifomari Niospa nāskarafos noko ōi. Keyokōi nō afe yoraxō nō Jesucristo fisti yopakōi.

¹² Niospa mato noikī mato katoni afe yorafo mā inō. Aa keskara shara mato imaxiki. Nāskakē fet-safo noikī ato sharafa fafafāikāfe. Nāskakē fetsafo shināki nā mā apaiyai keskara fisti shinātama, fetsafāfe apaiyaifo keskarari shinākāfe, oi tsii faxō ato yoifafāikāfe.

¹³ Nāskakē fetsafo fe mēnāpaitama ato yoisharakāfe raenāsharaxikāki. Nōko Ifāfe mato raefa keskafakī fet-safo fe raenā faatanāsharakāfe. ¹⁴ Nāskakē nā ē mato yoiai keskai, keyokōi noinākāfe, nō noināsharafinakōiaki. Nāskai nō noināx nō isharakōitiro, nā nōko Ifāfe noko yoini keskai nō noināsharakōiax nō nāskasharakōitiro.

¹⁵ Nāskakē Cristo nikasharakōikāfe māto ōiti sharanokai mā fochishpanā faatanātiroma. Askatamaroko aōnoax isharakōiax nā yora fisti keskara shara mā itiro. Nāskakē Epa Niospa mato katoni aōnoax mā isharakōita fetsafo mā afeska fanōma. Nāskakē mā Epa Nios yoitiro iskafakī: “Aicho Epa Niosi, ēfe ōiti mā sharafaxōa,” ixō mā yoitiro.

¹⁶ Cristo noko tāpimani keskafakī māto ōiti mēra nanekōikāfe. Nāato mato ikinākī āfe meka tāpisharakōixō fetsafori yoisharakāfe isharaxikakī. Māto ōiti mēraxō Nios aicho fata David fanāini keskai māri fanāixota āfe mekaōnoari fanāixokāfe. ¹⁷ Nāsxō nā mā apaiyai keskafakī yoikāfe iskafakī: “Aicho, Epa Niosi. Nōko Ifo Jesucristoōxō nā nō apaiyai keskafakī keyokōi mī noko axōfafāimis,” ixō yoifafāikāfe.

Nō Jesús Ifofakōinax aōnoa nō afeskatiromāki

¹⁸ Kērofāfe, māto fenefāfe mato yoiaifāfe ato nikasharakōikāfe. Nāskax mā isharakōikai nōko Ifāfe

mato yoi ai keskai. ¹⁹Feronãfakefãfe, mãto ãfiffo noikõikãfe ato fe feratenãyamakãfe.

²⁰ Fakefãfe, mãto epa yafi mãto efa nikakõikãfe. Mã askaino nõko Ifo matoki inimakõi kiki. ²¹ Epafo feta efafãfe, mãto fakefo ferateyamakãfe, mãto fakefãfe shinãkĩ iskafayamanõfo: “Ooa, ãfe epa feta ãfe efa ea feratenafo,” ixõ shinãyamanõfo.

²² ãto yonomatifãfe, mãto ifofo ato nikakõikãfe nono mai anoxõ. Akka mato õiaifonos ato yonoxokakĩma, mato õiamaifonori ato yonoxokãfe. Nã mãto Ifo Jesucristo mã noiaino, matoki inimanõ ato yonoxosharakãfe. ²³ Afara yonokĩ inimayanã axosharakõikãfe. Nõko Ifo shinãkĩ ato yonoxosharakãfe. ²⁴ Nãskakẽ shinãmakiyamakãfe mã mã tãpiaki nõko Ifo chipo afara sharafo mato inãxii kiki. Mã nõko Ifo Jesucristo yonoxosharamiski, nãfi mãto Ifokõikĩ. ²⁵ Akka nã afara chakafamisfo, nãfo omiskõi finakõixikani afara chakafakatsaxakakĩ. Nãskakẽ Niospa fetsa keskarrafo noko õima, nãskarafos noko õi.

4

¹ Ato yonomamisfãfe, mãto yonomatifo ato paraxõ yonokakĩma ato noisharayanã afara sharafo ato inãsharakãfe ato parakakĩma. Mã mã tãpiakĩ mãri Ifoyakĩ, mãto Ifãfe nai mēraxõ mato õifafaini kiki.

² Nãskakẽ Epa Nios kĩfiki xateyamakãfe, kĩfikĩ afara fetsa shinãkakĩma, Epa Nios fisti kĩfikĩ iskafakãfe: “Aicho Epa Niosi, mĩ ea sharafa fafafaĩni,” ixõ kĩfikãfe. ³ Nãskakẽ nokori kĩfixokãfe, Epa Niospa fetsafo mēra noko nĩchiano Cristoõnoa nõ ato yoisharanõ. Afãfe Cristoõnoa nikamisfomaki. Akka ã Cristoõnoa meka shara yoiaito yorafãfe ea karaxa mēra ikimanifo. ⁴ Ea Epa Nios kĩfixõfafãikãfe xafakĩakõi Jesucristoõnoa anã ã ato yoinõ.

⁵ Akka nã Jesús Ifofaafoma mēra mã ikaki ato õimakãfe mã isharakõixõ. Nãskaxõ nã mã atoki nokoaitĩa Jesucristoõnoa ato yoisharakãfe. ⁶ ato fe mekakĩ meka shara fisti ato yoifafãikãfe, ato kaxemetsama fakakĩma ato yoisharakõikãfe, ato õiti mēraxõ shinãchakanõfoma. Mã askakĩ nã yorafo mã ato kexesharatiro.

Pablo mã mekai xatekĩ Colosas anoafo ato meka shara fomani

⁷ Nofe yora Tíquico, ã aõ noikõi. Nãato efeta nõko Ifo Jesús yonoxomis. Nãskakẽ aato eõnoa mato yoi kiki ã afeskax nono ikamãkĩ. ⁸ Nãskakẽ ã mato ari nĩchia, aato mato yoinõ afeskax nono nõ ikamãkĩ, askatari mato inimamasharakõixiki. ⁹ Nã nofe yora Onĩsimõri afe kai, nãri ã noikõi. Nã mato fe iyopaoni, nofeta nõko Ifo Jesúsnoa yoi inimakõimis. Nã rafeta matoki noko kaxõ mato yoikani nono afe keskaramãki.

¹⁰ Akka na efe karaxa mēra imisto Aristarcori mato meka shara fomai. Marcosri mato meka shara fomai, nã Marcos Bernabé ãfe chai. Nãskakẽ nã Marcos matoki nokoaito ã mato yoia keskafakĩ ifisharakãfe kexesharayanã. ¹¹ Na feronãfake ãfe ane Jesús nãatori mato meka shara fomai, ãfe ane fetsa Justo. Nãfãfe judefo mēraxõ Nios Ifokõi fakaxõ efeta Nios xanĩfoõnoa yoikĩ yonomisfo. Nãskafakakĩ ea inimamakõimisfo. Akka ãfe kaifãfe nonoxõ efeta Nios yonoxomisfoma, nã ã mato yoiaifo feta ã Niosnoa yoimis. ¹² Na feronãfake Ipafrasri meka shara mato fomai, nãatori Cristo yonoxomis, nã mato mēra iyopaoni. Nãato mēxotaima matoõxõ Epa Nios kĩfikĩ iskafa fafafãini: “Epa Niosi, mĩ ato amapaiyai keskafakĩ ato amafe afaa fetsa shinãnõfoma. Nãskakanax mĩ Fake Jesús õiti keskara shara inõfo,” ixõ mato kifixõ-fafãini. ¹³ Akka mē õia na Ipafras matoõxõ shinãchakakõi-aito. Askatari nã pexe rasi Laodicea anoafo yafi Hierápo-

lis anoafo ato Epa Nios kīfixōfafāini. ¹⁴ Na Lucas ato sharafamis, ẽ aō noikōi. Nāato Demās feta mato meka fomakani.

¹⁵ A Jesús Ifofaafu Laodicea anoafo ea ato yoisharaxōfe. Nīnfasri ea yoisharaxōfe, a āfe pexe anoax Nios Ifofakanax ichanāmisfori ea ato yoisharaxōfe. ¹⁶ Akka na kirika kene ẽ mato fomai mā mā õixō, nā Nios Ifofaafu Laodicea anoafori ato fomakāfe akairi õinōfo. Māri na kirika kene õikāfe Laodicea anoxō mato mana manafono. ¹⁷ Nāskakē Arquipori ea yoikī iskafaxokāfe: “Epa Niospa mia yoia keskafakī axosharakōife,” ixō ea yoisharaxokāfe.

¹⁸ Ēkīa Pablo, ẽ mato kirika kenexoni. Mato yoisharakī, ẽfe mifikōichi ẽ kenei. Nāskakē ea shināmakiyamakāfe ẽ karaxa mēraxō ikakī. Niospa mato noikī matoōnoa shināfafāinō. Nā tii.

Niospa meka fena Jesucristoñoa
New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: (Yaminahua)

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Updates
eBible.org

PDF generated using Haiola and XeLaTeX on 3 Jul 2018 from source files dated 14 Jun
2018

6c7b7ce2-9d87-5405-91e6-71ce1387adcc